

'Sëedhε =plε -naa 'ö
 Piεε
 -ya bɔ -Zlan -bha mε -nu -dhë bhë
 'ö =nε

¹ 'Sëedhε =nε ma Simɔ Piεε 'a Yesu Klito -bha bɔmε 'ka bhë =nε 'a- bɔ mε -nu 'ö kwa -bha -Zlan 'ö kwa Dhame Yesu Klito 'ka 'ö 'yaa mεzëgüdhe kë -a -wun 'gü 'ö kwa -nu kwa -bha -zo -yö -a -bha -sü -wungbeezë bhë, 'ö- -ta 'dhö do bhë, ka -dhë. ² Kö -Zlan waa- kwa Dëmε Yesu -an dɔ -sü 'gü, 'glusë 'ö 'wo- kë -na ka 'ka waa- =zuöyagluu 'ö 'wo- nu -na ka -dhë bhë -wo 'dho 'dhiö -kplawo.

'Ta -kɔ -së 'ö -Zlan -bha zian -ta -a -gɔgɔ -nu 'wo- -ta
³ -A -bha 'piigbeedhε =ya kwa gbaa pë 'saadhö 'ö kwa -bha -tosiadhe -bha -wun -yö yö -a -bha -a 'ka kö 'kwaan- -kë -a 'gü -sü kë -klu -Zlan -bha -sü 'ka; 'ö =yaa- kë mε 'ö kwa =dhɔɔ -kë -a -de -bha 'tɔbhɔdhe waa- -a -bha këwun -së 'gü bhë 'kwa- dɔ. ⁴ Yö =ga 'ö- -zo kun, 'ö 'tɔ -go mε -dhë -pë -nu =vava 'ö -an -wun 'dhö 'gbee-, 'ö -an nu kwa -dhë kö 'kaan- bɔ -an -ta 'kaan- 'kan -ya pë -dhɔ 'ka -sü yaya 'ö dho mε 'ka 'gü =siö' -dhε -bha 'kpongtaa zö bhë -a -bha. -Yö kë 'dhö kö 'kaan- bhɔ -a -bha. ⁵ Pë -de 'ö -kë 'ka dho pë 'plε kë kö ka 'ta -kɔ -yö kë -së, ka -bha -zo yö -Zlan -bha -sü 'gü, 'ö 'ka dho -Zlan -bha 'wun -nu dɔ -sü -da ka 'ta -kɔ -së 'ö dho kë -a -ta 'ö bhë. ⁶ -Ka -de -kun 'wun -nu 'gü -sü -da ka -bha 'wundɔdhe 'ö -Zlan -bha 'wun -nu 'gü bhë -an -ta; 'wun -kë -de =tian' -sü bhë, ka -dho =zuösaadhε -da -a -ta; ka -dho -klu -Zlan -bha -sü -da =zuösaadhε -ta 'pö. ⁷ =Ya 'go mü, dhegluzë -nu -bha 'ko -sü -së -sü bhë, -kaa -da ka -bha -klu -Zlan -bha -sü bhë -a -ta. 'Ö -kaanta 'ka zlöö, 'ö ka -bha ka 'ko -sü -së -sü 'ö bhë,

'ka dho -dhɔ 'ö go -Zlan 'piö 'ö 'wo- -kë mε 'saadhö 'ka bhë -a -zuö -a -ta. ⁸Bhii -kɔ bhë =nε 'ö wɔ -kɔ -së -nu 'wo bhë 'ö =wa kaa ka 'gü =va 'ö ka 'ka 'dho kaa pë 'kpaan 'ka 'iin 'ö ka 'ka 'dhö -bo kwa Dëmε Yesu Klito dɔ -sü bhë -a 'gü. ⁹Kεε mε 'ö wɔ -kɔ 'ö bhë 'yaa- 'gü, =ya -dhε -ga, -a 'yan -nu 'waa -dhε yö 'ma =gbiin =nε 'yënnngtiimε 'dhö, bhii kö -a =zlöö =ya trö ziö 'ö -Zlan -ya wo -a -bha =sɔɔn yaa -nu -ta bhë -a 'ka.

¹⁰=Dhε -kë 'dhö, n dhegluzë -nu, -kaa 'slë =mεε' - kö 'ka dɔ gënnngdhö -klu -sü 'ka ka =dhɔɔ 'ö -Zlan -ya -kë 'ö ka -ya bhë -a 'wun 'gü; 'ö tɔɔ -a -kë 'dhö -sü 'ka =nε 'ö ka 'ka 'dho -püö 'wun yaa kë -sü 'gü. ¹¹-Kɔ bhë =nε 'ö -Zlan dho 'kwεε poë ka -gɔ 'gbεa 'ka kö 'kaan- -da kwa Dëmε, kwa Dhamε Yesu Klito -bha -gludëdhε -pö 'ö 'tɔbhɔdhε 'dhoë- -bha =toëpö 'ka bhë -a 'gü.

¹²'Kö -kë =nε 'wun -nu 'wo =nε 'ka -an dɔ 'saadhö 'ö 'ka -ya -sü 'ka kpinngdhö 'wun gia- 'ö 'ka- ma bhë -a 'gü, a -dho n -zo kë ka -zo -büö -a 'ka -sü 'piö -kplawo. ¹³⁻¹⁴Bhii kwa Dëmε Yesu Klito =yaa- kë 'ma- dɔ =nε -a yi 'yaa =gbiin gbɔ kö 'aan- 'go bun 'ö =nε -a 'gü. =Dhε 'ö -kë 'dhö, kö 'töng 'ö n -gɔ kö a =tun ka 'piö 'kpongtaa zö bhë, a -dho ka -ya 'yaan -kplawo mε -zo -büö -wo -nu 'ka. ¹⁵-Wo -nu 'wo bhë, a -dho pë 'saadhö 'plε kë kö =ya kë =nε 'maa ka 'piö zö gbɔ, kö -waan -ya ka =zuö' -bha -kplawo.

'Wun 'ö -gban mε -nu 'wo Klito -bha 'bhü yö -an -bha

¹⁶Kwa Dëmε Yesu Klito -bha 'piigbeedhε waa- -a -bha nu -sü 'ö bhë, yaa kë =nε -wo -go -kwεzü -wun -nu 'ö mε -nu -wa yö 'ko 'dhiö -a 'gü 'ö 'yi ka =daan -a 'ka. -A -bha -kë 'gblüünzë -sü 'ö bhë yi- -yö yi 'yanga gia- 'ka. ¹⁷Bhii yi 'ö kwa Dë -Zlan -yö =bhlë waa- 'tɔbhɔdhε nu -a 'ka -a -dhë bhë, -yö -kë yi 'yaan, 'ö yi bhë -a 'ka 'ö -Zlan -bha 'bhü 'gblüünzë -yö =yɔɔ -a -ta 'ö -wo do -yö -we 'ö- pö: mε 'ö =nε n Gbö -dhɔkaasüzë 'ö 'a n -zo 'kun -wun 'plεsεn -lo -a

kwEE yö -mü. ¹⁸ -Wo 'ö 'dhö bhë, yi- -ma 'dhö kö -yö 'we -na dhang- 'gü. -A yi bhë -a 'ka, yi -kë -tɔn 'slööslö tuö.

¹⁹ =Ya kë 'dhö, 'wun 'ö -Zlan -wodhiölmE -nu -wa =blEE bhë -yö 'dhö gia- 'ka. =Ya kë 'dhö kö =yö -së 'ka ka -zo 'to -an -dhë bhii -wo kë =nE =labang 'dhö -dhɛtiidhE 'gü, kwa =zuö' 'gü. 'Yö =ya kë 'ö =labang -nu 'wo bhë 'wo bhü 'dhö gbeng gbeng 'ö -toë 'pö 'ö -dhiadhiö 'susongga ('ö Klito 'ka bhë) 'ö -wo -a 'ka 'ö -dhE =poë' ka =zuö' 'gü ('papadhö).

²⁰ 'KEE kë- wo 'dhö bhë, -yö kë ka 'yaan =nE 'wun 'ö -Zlan -ya =blEE 'ö bɔa ö -wodhiölmE -nu -ta 'ö =bEEɲ- 'sü 'ka bhë, 'yaa pë 'ö mE -ya -gɛɲ pö ö -de =kwa' -wun 'ka -a 'ka.

²¹ Bhii -Zlan 'dhi -wo pö -sü 'ka- -ga -na bhë, mE 'bhee- -de =dhɔɔbhaa -wun 'yaa -mü 'KEE -Zuu 'slööslö =nE 'ö yö mE 'bhee- -nu 'wo bhë -an -dhë 'dhiö 'ö 'wun 'ö -gban -Zlan -bha, 'ö 'wo- =blEE.

2

'Wun 'ö -gban mE =daan' -mE =suazë -nu -bha
(Zudë 4-13)

¹ Kë- wo 'dhiö bhë, -Zlan -wodhiölmE =suazë -nu -wo -kë -dhö; -kɔ do bhë =nE 'ö mE =daan' -mE -nu =suazë 'dhoë- 'ka ka ziën. -Wo -dho mE =daan' -wo =suazë -nu 'ö dho kë mE 'gü -siö' -wun -nu 'ka -yö 'ko 'dhiö kö -waan ka =daan'-. -Wo -dho -kɔ kwa DëmE 'ö -an dha bhë -a -wun 'ka 'ö 'wo wo -de -da 'güsiödhe 'ö nu -na mE -nu -ta 'zodhö bhë -a 'gü. ² MÈ =plëezë -wo -dho ziö -an -bha -tosiadhe 'ö 'wundɔdhe gbE 'yaa- 'gü bhë -a 'piö; 'ö -an kë -kɔ -wun 'gü 'ö mE -nu -wo 'wun yaa =blEE' 'wun gia- -zian -bha.

³ 'Wëüga -wun 'gü, mE =daan' -mE =suazë -nu 'wo bhë -wo -dho ka -püö -an -de -yö 'ko 'dhiö -wun -nu 'ka. 'KEE kë- wo 'dhö bhë, za 'ö dho kan bhë, -an -bha =ya -lo -an tuö 'saadhö 'kpa -pë. -An 'güsiömE =ya -da zian-.

⁴ Ka gia-, -ka -dhe -ga bhë 'dhe! -Zlan -bha bome -nu 'ö 'wo =soon yaa -kë bhë, yaa -an kuënnu ö 'piö, 'kEE -yö -an -zuö -dhetiidhe -bha -glu 'kpa 'dhi =va 'gü; 'ö 'wo dho to mü 'dhö kö -Zlan -bha zakanyi -yaan -lo -a 'ka. ⁵ ME -nu 'wo -kë 'kpa bhë, -Zlan yaa -an 'to; 'kEE -yö 'yi =va -pa 'kpongtaadhe -dhiizë -ta 'ö mE 'plE -wo to -a 'gü -a 'ke yaa kë Noe 'ö -kë 'wun 'ö kpengdhö -a =blEE' -mE 'ka waa- mE 'slaplE 'bhaa 'ö 'wo dha 'yi bhë -a -gö 'pö -an 'ka. ⁶ -Zlan -yö Sodömë -pö waa- Gomoo -pö -an 'gü -siö 'siö =kwaa'. 'Wun -nu 'wo bhë -wo pë -nu 'wo dho kë këpëyaamE -nu 'wo dho nu bhë -an 'ka bhë -an -bha 'wun =zuan' 'ka. ⁷⁻⁸ 'KEE yö -ga 'ö Lotö 'ö -kë mE kpengdhö 'ka, 'ö- =zuö' -yö -da -wEE 'gü mE -nu 'ö -kë -an ziën bhë -an wo -kö -nu 'ö- 'yan -yö -daa 'gü yi 'saadhö 'ka bhë -a -wun 'gü bhë, -ya -dha. ⁹ Ka- yö bhë =a! =Ya kë 'dhö kö mE -nu 'wo -klu -sü 'ka -a -bha bhë -yö -an dha 'gü dandhe -gö, 'ö mE -nu 'ö 'waa kpengdhö bhë 'ö -an -ya 'klobhödhe -gö -Zlan -bha zakanyi 'ka. ¹⁰ -Ii- 'kEE mE -nu 'ö dho -an 'klo bhö 'wo töö mE -nu 'wo 'wun -nu kë -na mE 'bhee- -de -zo 'kun -wun -bha -de -kë -dhiizë -sü 'ka 'ö -Zlan -bha -kë kwa DëmE 'ka -sü bhë 'ö 'yaa -an -dhë pë gbE 'ka bhë.

ME -nu 'wo bhë, -wo wo -de -sü =va 'ö 'wo wo -de -ga 'gianzë mE -nu 'wo to -an -ta; 'suö pë 'tee -de 'yaa -an =zuö' -bha yö -ga 'ö 'piigbeedhe 'töbhöszüzë -nu 'wo dhang- 'gü bhë 'ö 'waa -an =bhlë -ya bhë. ¹¹ 'KEE kö -Zlan -bha bome -nu -de 'wo dhang- 'gü kwa DëmE 'dhiö 'ö 'wo =faanzë, 'wo 'piigbeezë 'wo =zië' mE =daan' -mE =suazë -nu 'wo bhë -an -ta 'waa 'wun yaa =blEE' -piigbeedhe 'töbhöszüzë -nu 'wo bhë -an 'ka DëmE wö 'dhiö. ¹² 'KEE mE -nu 'wo bhë -wo 'wun -nu -kë wo =zuö' tii -bha =nE 'blü 'wü -nu 'wo -da kö -waan -dhaa -da -an bhöEE -an 'dhö. Pë 'ö 'waa- dö bhë, -wa -kë 'yee -to -a -bha -wun 'ka. 'KEE -wo -dho to wo -de këwun bhë -a 'gü, 'ö -an 'gü -yö =siö =nE wü -nu 'wo bhë -an 'dhö. ¹³ 'Klobhödhe 'ö 'wo mE -nu -da -a 'gü bhë =nE

'ö -an =saan' dho bhoë. -Wo wo -de =dhooɔbhaapë -yö wo 'yi -kan -a -dhë pë -nu 'wo- kë -na =dhe 'po -yi 'ka bhë -a 'gü. ME -nu 'wo bhë =wa kë -dhiizë; -an -bha -kë ka 'piö -sü 'gü ka -bha -kɔ -da 'ko 'piö -sü -nu 'gü -sü 'ö bhë, -yö lë- -wun 'ka, 'ö ya; bhii -yö -an =zuö' -bha -waan wo -de kë kpengdhö ka wö 'dhiö -an -bha -kë ka 'piö -sü 'gü. ¹⁴Pë 'ö =ya -an 'yënnng -dhe pa 'ö tɔɔ -dadheüsü. -An 'gü 'yaa ga =soon yaa kë -sü 'ka; kö ME 'wo 'tëëtë -zo yö -sü 'gü -wo -an -püö -na. -An =zuö' -yö -klu -sü 'ka 'slë 'wo dho -a kë -waan 'wëü- yö -a -bha; =wa kë zlöö -bha ME -nu 'ö -Zlan -bha 'dhangga 'dhö -an -ta -an 'ka. ¹⁵ME 'wo bhë =wa 'go zian -së -ta, =wa wo -de -da 'blü Balaamö -bha zian -ta. Bozɔɔ gbö Balaamö 'ö bhë kë- wo 'kpa bhë, -yö -Zlan 'dhi -wo -pö; 'kEE 'wëüga -dhɔ -yö -kë -a kë =dhia giagiawo. 'Wun yaa =nE 'ö -kë 'ö =ya kë 'ö 'wëüga yö. ¹⁶'KEE kë- wo 'dhö bhë, 'wun -yö -blEE -a 'ka -a -bha =göügbeedhe bhë -a -wun 'gü; yö =ga tɔɔ yi do 'ka, =soofang mu do -yö 'wun =blEE ME 'bhee- -wo 'gü; -kɔ bhë =nE 'ö ME bhë, 'ö- -bha 'wun -nu kë -sü 'ö 'wun dɔ -sü 'yaa- 'gü bhë, 'ö =gbaannu -a 'ka.

¹⁷ME -nu 'wo bhë -an kë -kɔ -nu -wo -kë =nE -dhe 'ö dhoo -nu -wo dho -a -bha 'yi 'tɔɔ- =bhaa 'ö 'wo- -yE -a -bha wo -kɔ 'flëë 'ka -a 'dhö, 'iin =nE -dhe 'ö dha kpö -nu -wo nu -a -bha dhang- 'gü -a 'dhö; 'ö -dhe 'ö ME -nu 'dhö -kpe kë -na, 'ö 'tëë -nu -wo nu 'wo -ziö -an 'ka -a 'dhö. Pë 'ö -Zlan -ya -ya -an -gɔ 'ö tɔɔ -dhetiidhe 'ö -trö 'sënsëndhö. ¹⁸=Wa 'wun -nu =blEE', -a -gEɛ 'yaa kë -dhö 'ö 'wo- =blEE -de -sü =va 'ka; 'ö ME 'bhee- =dhooɔbhaa -wun -nu =lɔɔzë 'ö 'wundɔdhe -së 'yaa- 'gü bhë 'ö ME 'wo 'go -na dha =dhia ME -nu 'wo -tosiadhe kë -na 'wun =zaa' -sü 'gü -an ziën bhë, 'wo- -da -a =zuö' -bha kö -wo -an -püö. ¹⁹-Wo -potaasü 'tɔ go ME -nu -dhë 'kEE kö wo gia-, wo -kɔ yaa -nu 'wo dho ME 'ka 'gü =siö' -dhe 'gü bhë, -wo -an -gɔ =nuadhE 'gü. -A pö 'a- wo 'dhö bhë, 'ö tɔɔ ME 'ö -dhö,

pë =ya kë -dhö -yaan kë 'gbee- -a -ta, kö -ya -gɔ =nuadhɛ 'gü. ²⁰ Bhii 'ö tɔɔ =ya kë =nɛ mɛ 'bhee- -nu =wa bɔɔ =taa' -dhiipë -nu 'wo 'kpongtaa zö -an -dhë, kwa Dëmɛ, Mɛdhamɛ Yesu Klito dɔ -sü -wun 'gü, 'go mü =wa 'yɛ wo 'zü =wa 'dho 'kpongtaa -dhiipë -nu 'gü, kö -an kë -kɔ 'ö zlöö bhë =ya ziö =gɔü' -a mɛ 'ö -kë 'dhiö bhë -a -ta. ²¹ -Yö 'gian -an -bha 'ka -bezë kö =kun 'ö 'wo zian kpengdhö dɔ 'ö =zië' zian dɔ -sü, 'ö 'wo 'go -na tɔng 'slööslö 'wo- =daan bhë -go -a -ta -sü -ta. ²² -Piën bɔ -wo do -ya -pö: Gbɛn- -yö 'yɛ ö 'zü 'ö 'dho ö -pe =taa. 'Yö- pö 'zü: -Bɔ tii 'ö =ya 'zlu 'saadhö bhë, =ya 'dho -dëüwo 'zü =glöng 'glö =dhia böü- 'gü. (Mɛ -nu 'wo bhë, pë 'ö -kë -an 'ka bhë, -ya -zɔn =nɛ -piën 'ö bhë 'wun gia- -mü.)

3

Pë 'tɔ go -wo 'ö -gban Klito -bha nu -sü -bha

¹ N dhegluzë -nu, ka- -yö bhë =a! Ma 'sëédhɛ kë =plɛ -naa 'yaa -mü 'ö =nɛ =a; pë -nu 'a- -ya -an 'gü 'wo tɔɔ kö mɛ =daan' -wo 'a ka -zo -büö -na -a 'ka -kplawo bhë -wa kë kö ka =zuö' 'piö -wun -nu -wo kë 'kpëdhö, ² -yö kë 'dhö kö ka -zo -yaan -büö 'wun 'ö -Zlan -wodhiölomɛ -nu 'slööslö -wa =blɛɛ 'kpa bhë waa- kwa Dëmɛ 'ö Mɛdhamɛ 'ka bhë -a -bha tɔng dɔ -wo -nu 'ö- -bha bɔmɛ -nu -wo ka -daan -a 'ka bhë -an 'ka. ³ 'Kɛɛ -yö kë ka 'yaan -blɛɛzë 'ka =nɛ yi -kaanta -nu 'ka, 'yee -to mɛ -bha -mɛ -nu -wo -dho kë -dhö; -wo -dho wo -de -dhi -a -dhë -wun -nu kë 'ta 'sü -sü 'ka -ya pë -dhɔ 'ka -sü 'ka. ⁴ -Wo -dho 'yee to ka -bha -a pö -sü 'ka =nɛ: «Kë- wo =nɛ Yesu yaa- pö ö -dho yɛ ö 'zü 'ö nu =a? 'Yaa 'dhö a? -Yö 'më 'sa 'ö -dhɛ -kë 'dhö =nɛ 'ö mɛ -nu 'ö -wo bhë 'ö -we -an -dhë 'ö 'waa -dhö gbɔ, 'ö 'kpongtaadhɛ 'dhö =tun =nɛ -kɔ do 'ö =kaa' -a züdüyi 'ka -a 'dhö =nɛ =ɛ?» ⁵ 'Kɛɛ kë- wo 'dhö bhë, -an -zlö =ya trö 'saadhö =nɛ 'kpa bhë, =dhɛ 'ö -Zlan -yö -we, 'ö dhang-

-nu -wo -kë, 'ö 'yi -nu -wo dho wo 'kuë- 'pian do 'ka -dhe -nu 'gü, 'ö 'sε -yö -kë -dhö bhë, ⁶ 'kpongtaadhe zii 'gü -yö -siö -kɔ do bhë -a 'ka 'yi =va 'ö- pa bhë -a =kwa'. ⁷ -Kɔ do bhë -a 'ka 'ö dɔ 'kwa- wo =dεε =nε 'ö 'kpongtaadhe waa-dhang- -nu 'dhö -ya -sü 'ka -a 'ka kö -an 'gü -yaan =siö' 'siö =kwa' -Zlan -wo do bhë -a 'ka. -Yö -dho kë 'dhö yi 'ö za dho dɔa =kian' yaa -mε -nu -bha kö -an 'gü -yaan =siö' bhë -a 'ka.

⁸ 'Kεε n dhegluzë -nu, pë 'ö ka 'ka 'dho kun -a -wun dɔ -sü 'ka 'ö tɔɔ kwa Dëmε -bha 'ka, -dhekpaɔyi do -yö =nε -kwε -vuu do 'dhö, 'ö -kwε -vuu do 'dhö =nε -dhekpaɔyi do 'dhö. ⁹ 'Wun ('ö -gban kwa Dëmε -bha nu -sü -bha) 'ö- 'tɔ go bhë, yaa kë =nε -a yi -blü 'ö- wo 'dhiö =nε -kɔ 'ö- 'ka mε 'bhaa -nu =zuö' 'gü bhë -a 'dhö; 'kεε kë- wo =zian' =zuösaadhe 'gü kwa buëndhö, bhii 'ö tɔɔ 'yaa- 'piö kö mε gbε 'gü -yö =siö'; -ya -kë 'dhö =zian' kö mε 'plε -waan 'go wo -bha =sɔɔn yaa 'gü, kö -waan =dhië' -a 'piö.

¹⁰ Kwa Dëmε -dho nu =nε =kwaanmε -yö nu mε tii 'ka. -A yi bhë -a 'ka, dhang- -nu -wo -dho ziö 'wo dho; wo 'ka 'dho kë -dhö gbɔ. 'Kεε -an 'dho -zuö -yö -dho kë -ziizë. -A yi bhë -a 'ka, pë -nu 'wo dhang- -nu 'gü, -an 'gü -dho =siö' 'siö =kwa'; 'sε waa- ö -ta -pë -nu 'plε, -an -bha -këdhösü 'dhiö -dho toë yi bhë -a 'ka. ¹¹ Ka- -yö bhë =a! Kwa gia- -yö kwa 'yaan 'ka -wun 'ka =nε pë 'plε 'gü -dho =siö' =nε -kɔ bhë -a 'dhö. =Ya kë 'dhö kö 'ta -kɔ 'ö 'ka dho taa 'yaa ka 'yaan a? Yö =nε 'ö tɔɔ -tosiadhe 'ö kpengdhö 'ö 'wo -kë -klu -Zlan -bha -sü 'gü, ¹² -ya -a -gɔ -sü 'ka, 'iin kö 'kwaan- kë kö -yaan nu 'zodhö kwa këpë -nu 'gü. Yi bhë =nε 'ö dhang- -nu 'gü dho =siö' 'siö =kwa' -a 'ka, 'ö pë -nu 'wo dhang- 'gü 'ö 'wo dho kpö 'siö bhë -a nε- -bha. ¹³ 'ö bhii pë 'kwa -ya -a -gɔ 'ö tɔɔ dhang- -nu -dëü waa- 'sε -dëü 'ö -kë kpengdhö -sü 'dhö -a -ta 'ö -Zlan -ya 'tɔ go bhë.

¹⁴ 'Wun bhë -a -wun 'gü, n dhegluzë -nu, =dhe 'ö -kë

=nε kwa -ya pē -nu 'wo 'dhö bhē -an -gɔ, -ka dɔ 'gbee-kö -waan ka yō mε 'ö -dhii 'yaa -an -bha, 'ö =zuöyagluu 'dhö -an -gɔ -Zlan wö 'dhiö -an 'ka. ¹⁵ Kwa Dēme -bha =zuösaadhε bhē -yō kē ka -gɔ =nε 'töng 'ö =tun ka -gɔ kö 'kaan- ka -de =baa'- dhasü 'gbloo 'piö -a 'dhö =nε -kɔ 'ö -Zlan -bha 'kpaakpadhε 'gü 'ö Pɔlö, kwa dheglu -dhɔkaasüzē -ya =bεεn -a 'ka 'ö- bɔa ka -dhē bhē -a 'dhö. ¹⁶ 'Wun bhē =nε 'ö 'wun -gban -a -bha 'ö- -ya ö -bha 'sēēdhε 'plε 'ö- bɔ -na ka -dhē bhē -a 'gü. Yö =ga =dhε -kē =nε -a -bha 'sēēdhε -wo 'bhaa -nu -gεn ma -sü -yö 'gbee-bhē, 'ö mε -nu 'ö 'waa 'wun -gεn dɔ 'ö -dɔ gεnngdhö -sü 'yaa -an -gɔ -zo yō -sü 'gü bhē, 'wo- -gεn bho 'gbloo 'gü =nε -kɔ 'wo- kē -na -a 'ka -Zlan -bha 'sēēdhε =bεεn' -wo 'bhaa -nu 'gü bhē -a 'dhö bhē. 'Kεε kē- wo 'dhö bhē, wo -de -da 'wo- wo -na 'gü =siö' -zian -ta bhē.

¹⁷ 'Kεε ka -zē, n dhegluzē -nu, ka 'paan =ya bho 'saadhö =nε bhē; -ka dɔ ka -de 'slē 'ka kö -kun 'ö 'ka dho ka =kwa' ka -de -zü 'ö kēpēyaamε -nu -bha 'wun -kun 'kuē -sü bhē 'ka ka -de to -a 'gü 'ö pē mε 'ö =ya -ya ka 'gü bhē 'ö dha ka -gɔ. ¹⁸ -Ka 'dho 'dhiö =zian' kwa Dēme, kwa Dhamε Yesu Klito -bha 'glusē waa- -a -bha 'wun -gεn dɔ -sü 'gü. Kö 'tɔbhɔdhe -yō kē -a -bha 'ka =dεε, =toēpö 'ka! Amεn.

'WUN SĚ -NAŌ 'SĚĚDHĚ

Dan: 'WUN SĚ -NAŌ 'SĚĚDHĚ New Testament

copyright © 1991 Wycliffe Bible Translators, Inc.

Language: Dan

Dialect: Western

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 1 Jun 2022

74f67de7-5f93-5988-92e9-b1a45247636e